

四庫全書

集部

欽定四庫全書

公是集卷二十二

宋 劉敞 撰

五言律詩

銅陵阻風

驚浪乘風疾浮雲映水低  
卷帆高卧熟看鷁退飛  
迷山遠微分樹村深略辨雞  
蕪葭縈客恨極望正萋萋

螳螂

玄蟬無所營風露正淒清執翳機何密當車勇自輕將  
迷黃雀患已變玉琴聲得喪還相召南華所以驚

雨中入省

簡書無暇日風雨送殘秋車馬常侵旦泥塗空自愁平  
生本迂拙歲暮強淹留會將投劾去偃息謝交游

旅居雨中

塵垢厭渙浥風雨為驅除稍稍煩襟盡蕭蕭秋氣初堪  
憂忘陋巷匡坐讀羣書半夜梁山操悲歌問起予

雨中

蕭蕭過軒雨物色送春歸  
樹綠初成蓋垣青半長衣吟  
懷空擾擾愁思動依依想似江南景  
草長鶯亂飛

北牕聞雨

泄雲霏棟宇危葉墮霜枝忽忽時  
空晚蕭蕭坐自悲竟無高枕興  
還有閉闌宜生事安蓬翟商歌恣所為

送因甫宰湘鄉

相思恨不見今子去長沙  
幸有國百里可憐天一涯春

風洞庭水殊俗楚人家回首傷卑濕知君髮易華

挽仁宗皇帝歌四首

漢恩隆四世商歷盛三宗與子孫能繼寧民戶可封雲  
歸疑厭代鼎就莫攀龍廟樂兼韶武應傳盛德容

措刑文武後四十有餘年幾與華胥比寧知帝力然占  
齡無協夢棄躡趣登山後世稱稽古應參堯舜篇

不陣威逾遠無為俗自柔詩書通月窟簫勺靖炎陬畢  
陌宮車晚蒼梧草露秋定知千歲後民尚是軒邱

謳歌歸命啟過密罄宗堯陵寢略依漢衣冠深堊橋空  
看同軌至非復總章朝西望新宮柏悲風亦後凋

太一齋居

適野性所喜采真今更諳地偏塵土少人遠井泉甘長  
日眠高枕微風酒半酣從來天尺五信有此城南

城南晚歸

高秋變搖落遠水露澄明飛鳥江中墮孤帆木末征逆  
風吹帽側疎雨逐雲行興盡聊當反塗窮眼自驚

獨酌憶和甫

開牕一杯酒獨酌靜無言明蟾不可駐流水自東奔野  
犬迎虛吠舟人爭渡喧悵然此時意不醉已消魂

履冰

昔聞小旻戒今踐薄冰行涌水怒愁裂寒蛟蟠畏驚遲  
遲但覺遠戰戰尚思輕誰斷孤疑志窮源更北征

燒殘樹

古樹荒祠側他年雷震餘蛟龍從此逝螻蟻至今居錯

節摧犀甲燒痕蠹漆書會看妨要路終勝斷溝渠

雙樹

吾廬雙好樹簇簇近浮烟急雨仍堪倚斜陽不廢眠山  
童勤掃葉稚子莫驚蟬俗態輕幽寂柴門賴素偏

題巷北桃花

深巷山桃樹無人亦自芳青苔何限地紅萼可憐香俗  
眼輕幽僻陰天逼艷陽殷勤謀一醉容易送春光

杜祁公挽詞二首



天下蒼生望朝端  
百辟師辭榮如棄  
躡得道去乘箕無  
復臨雍問空餘罷  
市悲會書廊廟語  
世世奉蕭規

第五廡莫比留侯  
功不居遺風何峻  
極雅尚得冲虛平

昔常開閣深慙晚  
曳裾千金論一字  
永慨袖中書

某去年方

與公相識後累得公書  
皆草書親筆勁媚可愛

### 送人之洛

逢人問嵩少千里  
駕征軒倦馬夜未  
寢鳴蟬秋尚煩風  
煙新洛邑冠蓋上  
東門合有西賓問  
歸時許共論

聖俞墜馬傷臂以其好言兵調之

知兵心自許見謂百夫雄上馬常慷慨墮車寧困窮誠  
非代大匠疑欲作三公匹似陳湯病猶成絕域功

烽火

壬午歲自關中河北至青州  
皆設之于是烽火通齊秦矣

齊秦誰謂遠烽火自相通消息雌雄國關防百二同流  
光下滄海飛焰避驚鴻不及承平日空悲垂白翁

得貢甫巢縣書云阻風

別離常作惡衰老異他時望望風波苦悠悠見女悲江

金史四庫全書  
卷二十二  
空人迹絕天  
迥鳥飛遲若復無雙鯉何由慰我思

曬書

先祖賜書  
法帖甚多

藏書不滿萬  
幽蟲亦時除  
上有朝廷副  
多從秦漢餘  
山川迷禹穴  
雲海隔崑墟  
持此遺清白  
歸來林下居

邵少卿挽詞二首

湖海青雲器  
朝廷白首郎  
蹉跎遇已晚  
零落意仍傷  
屢擁行臺節  
頻腰太守章  
東南滿遺愛  
不獨一桐鄉

廣柳非高蓋  
空山異昔歸  
善人天不與  
行道涕交揮  
髣髴

髯音容在留連義故違安居自傳世間里尚光輝

君為三轉

運又累典大藩致仕而終

鎮潼觀察留後贈侍中李君挽詞

君諱節旄守潼淵其先人亦嘗

守潼

淵

築壇辭將鉞分土繼緇衣忌滿名猶誤宜年報尚非離  
鴻哀斷續埋玉想光輝冥漠金貂贈空看鹵簿歸

侍讀右丞贈尚書李公挽詞

扶陽詩禮學世世有知名玉樹芳榮早金華地望清川

沈終合劍風折欲分荆蕭瑟烏衣巷偏傷道路情

再見禁卒住桂陽二首

古亦苗民患今仍禁旅過祆氛半翼軫殺氣覆山河御  
史暴公子將軍馬伏波不應淹日月頻獻凱旋歌

肅肅卷征甲蕭蕭出郢門蛟螭雄步驟鷹隼急飛翻數  
有蠻夷警遙憐賦稅煩唐虞兩階舞帝肯用昌言

丁右丞挽詞二首

再歷三公府終崇萬乘師優游邇臣表簡淡古人為愛

士常推轂傳家不遺危平生赤松願猶復白駒悲  
司籍歸良史調鐘待一夔遽聞麟掩袂猶缺鳳來儀絕  
筆流風在遺音後世知春原國人送黃鳥寄哀詩

國殤

屢聞戎馬入輒有國殤詩多壘非吾責亡民痛爾為請  
纓慙肉食無敵怪王師聞道臨洮野天陰戰骨悲

暮角

落日孤城閉高風暮角愁邊聲亂歸馬物色向新秋尚

有單于怨仍傳出塞憂時平翻感激不語看層樓

題天池館二首

誰人畫素屏中座對滄溟雲氣隨蛟蜃波濤湧戶庭風

高鵬解羽天近客浮星會有湯湯意無琴亦自聽

粉墨勢回環滄波入座間溟茫朝百谷迢遞隔三山怪

獸有時化孤槎何日還乘桴古人勇向壁每慙顏

自長平至陳州河水絕清

清川百里餘淨淥照空虛落日金波蕩微風霧縠舒瑩

心看白石明目數游魚洗耳非吾事茲身與世疎

金山館

出塞二千里荒亭無四鄰貪烏飢攫肉狡兔急投人短  
短西隅日冥冥北路塵腰間丈二組空愧漢廷臣

庶幾堂雨夜偃几作

短夜催微月流雲濕太空蕭蕭鳴竹雨颯颯舞松風形  
影明燈裏歡娛隱几中吾衰儻未甚正復夢周公

春晚



芳菲不少住白日定空長庭樹暗新綠春衣生晚涼悠  
悠向時節細細到壺觴誰使風前絮來參醉後狂

鐵漿館

稍出廬龍塞回看萬壑青曠原開磧口別道入松亭

此館

以南屬奚山溪深險以北屬契丹稍平行漸近磧矣別  
一道自松亭關入幽州甚徑易敵常祕不欲使漢知

敵馬寒隨草奚車夕戴星

奚人以車帳為  
生晝夜移徙

忽悲田子泰

寂寞向千齡

涼雨

晚雨蕭蕭急秋陰處處高風雲愁宇宙淮海怒波濤貧  
有匣中劒飢餘井上桃誰能散積霑萬里度鴻毛

風雨寄張野人

天地初開泰雲雷未厭屯泥深長閉戶謀拙苦憂貧狼  
籍千株雪空亡一半春仍愁三徑裏草色斷幽人

張好  
周易

陰陽之說故詩有泰  
屯狼籍空亡之語

孤壘二首

孤壘敞新觀層軒臨暮霞分明魚意樂徙倚客愁賒遠

近見百里高低有萬家春風甚不遠更種滿城花

落日含古意高臺多遠心魚龍潛凍水蟋蟀有哀音江  
漢南浮遠關山北望深張衡四愁意歷歷起登臨

連日西南風戲作

連日風且曠端居突不黔西南人殆絕甲子雨還兼巫

峽雲屢起洞庭波正添誰能誅屏翳試使後飛廉

離騷  
日後

飛廉使  
奔屬

雨中送攷入京兼呈諸親舊

江外五年別齋中三日留何能慰衰疾正足亂羈愁澤  
國瓜時雨淮山桂樹秋思歸欲招隱一一謝交遊

對雪

朔雪似迎春霏霏散玉塵稍看人迹絕坐對物華新地  
暖消還疾風高舞正頻郊扉聊自卧誤怪洛城人

對雪憶隱直

浙浙度牕竹紛紛綴館梅怕消愁寂寞看舞愛徘徊寡  
和思吾友相望共酒杯時披白鶴氅西北上高臺

八月十六日夜月

不減冰輪滿微增玉漏長  
過雲收薄潤重露濕清光  
歷歷素娥影菲菲丹桂芳  
枯槎容容載醉過羽人傍

秋霽望月

明蟾此夜新竚立爽精神  
幾夕隔霖雨相看如故人  
風生疑折桂雲過欲埋輪  
應有關山客長歌淚滿巾

送張器著作

昔年聞子虛上國重相如  
老厭諸侯客晚陪東觀書  
絃

歌魯儒習風俗楚人餘感激青雲功名亦未疎

江行寄隱直

自念復遠適與君仍解攜天文鵜首尾地勢陝東西江  
漢饒風雨關山盛鼓鼙離憂各易老秋意欲悽悽

新梅寄春卿給事

徂歲嗟無奈新花笑自如雪魂消去未春色復歸初欲  
折意空遠少留香有餘一枝寄驛使浪語故愁予

禦冬

金剛經  
卷三十二  
漂泊愁多病差池歲復闌老驚時月疾貧畏雪霜寒外  
物闕身足空堂寓膝寬敢希王佐略聊取一枝安

春日小園憶張六

不見張公子春遊分寂寥獨行愁楚澤何處榜吳橈芳  
樹皆宜笑垂楊總細腰一樽成強醉四望欲魂銷

雪後遊小園

園林過新雪草木散芳華物色皆疑似春歸亦有涯  
泥生沮如凍乳滴楂枒所適從吾樂淹留見暮霞

納涼明教臺呈太守

榻移隨樹影杯側見山岑  
白鳥渴求水玄蟬清噪林  
道書無近語天籟有遺音  
向北新開逕行苔過竹陰

臨淵亭寄輦下親舊

蠶魚山逸選

北有蠶尾山  
又有魚山

濟汶水交流信美終非土思

鄉更倚樓露滋黃菊晚風起  
白雲秋長嘯澄潭上誰憐  
公子年

丁酉五月郭守恩戰歿武戡走入壁守恩勇將有



智略

敵兵得漢巧五月戰西河壯士平原死孤城殺氣多猶  
聞疏勒守無復魯陽戈不反東流水滔滔奈爾何

聞舅氏以祕書監致政謹獻拙詩為賀

今日王朝士多稱賢大夫恩榮隨几杖官職上蓬壺行  
路歎或泣都城畫有圖他時辟雍問惇史記訐謨

得和書自越入京時寓商丘

遙想行舟處春江花正繁殊方更回首不語獨銷魂寡

和愁郢客雅遊思兔園吾能事應聘見爾大梁門

送杜橫州

小郡橫山外居民半島夷路偏逢客少地濕見秋遲銅  
鼓侵城角蠻旌接使麾平生聞義勇好祭伏波祠

送余江州

潮汐通城下東南仍上游懷章趨便道疊鼓送華舟卷  
旆鷹隼急落帆江漢秋心知戀魏闕頻上庾家樓

冬至郎事

金史四庫全書  
卷二十二  
南極日差永幽人喜不勝陽生漸埋鬱陰老尚憑陵風  
解吳山雪江流蜀地冰衝寒彊乘興展履過鄰僧

晏公挽詞三首

望苑收英雋巖廊奉德音功如四支重化以二南深安  
仰嗟維石能傳賴碎金浮雲送哀挽慘澹更為霖

簡易能容士精誠樂與賢如何五湖上非復赤松年几  
几空遺鳥悠悠不問天獨應春輟相令望故依然

袞韞三司舊笳簫一品榮獨傷去國意仍以撫封行落

日白駒影空林黃鳥聲公歸那不復悽愴國人情

鄰幾挽詞二首

其叔為之主

那知一樽酒流涕寢門前非復平生日空看東逝川詩  
書遺素業山水闕空弦人物陳留古當憑耆舊傳

忘年一傾蓋適意兩虛舟老去翻相失人生固若浮  
蕭條蒿里餞零落竹林游知與不知者同時俱涕流

聖俞挽詞

孤宦衆人後空名三十年交游一時絕詩筆四方傳歸

旒江湖永藏書日月邊應封史通子他日慰窮泉

聖俞預修

唐書書成未上而亡議者欲請于朝賜一子官以追寵之

### 洗竹

舍側萬竿綠蕭蕭終歲佳翠深疑魍魎根老畏龍蛇翦  
剔扶霜節分張及馬過世無嵇阮輩竟負野人家

### 爆竹

節物隨時俗端憂見旅情土風猶記楚辭賦謾譏傖烈  
火琅玕碎深堂霹靂鳴但令休鬼瞰非敢願高明

歲暮憶隱直

歲窮浩長歎心事如波瀾高卧老將至相思天正寒浮  
雲紛霰雪陋巷獨瓢簞裹飯非無意悠悠行路難

雪中與長文景仁會西閣

梁山風與雪歲暮自崢嶸誤逐滄浪叟飛來白玉京屯  
雲紫微閣疊壁九重城更挹浮丘袂端令俗眼驚

梅

澤國春還早山梅臘競花繽紛迷雪意浩蕩逼年華驛

金史四庫全書  
使紅塵遠江風短日斜芳菲恐易失愁思亂悲笳

立春日雪中遊蒙谷

冰解泉應動雲寒雪更飛谷中知律變林下覺春歸風  
物如游蜀衣冠似浴沂瑤林與碧樹處處競芳菲

墨竹

羈游念此君子墨慰幽人洒落不經思蒼筤如出塵交  
加月下影濃澹霧中筠試作吳山想蕭蕭意亦真

夕陽

過雨風景好斜陽林下明倦游宜几杖卻埽稱柴荆宿  
蝶依花靜歸禽觸葉驚逍遙共茲世聊復得吾生

寄題歙州流盃池

公子愛客意高山流水間清波無斷續翠幘自迴還野  
興四時得棠陰終日間何當竹林賞醉耳聽潺潺

答張給事途中微雪見寄四韻

空行萬里塞不見六花飛

自北庭回三十餘程未嘗見雪

今日傳清唱

端來點客衣度關迷馬色拂樹散春暉不減山陰興從



軍中夜歸

雪後

飛塵暫消凍春意亦冲融  
野水涓涓綠林梢靡靡紅  
躍魚輕泮凍鳴鶴舞和風  
出處驚時節悠悠看歲窮

古北口對月

萬古關山月遙憐此夜看  
蛾眉空自嬾叢桂不勝寒  
他日刀頭問何時客寢安  
因之千里夢共下白雲端

新月

花外驚新月春殘復滿弓餘香輕墜露疎影細寒風火  
禁通方俗年華思老翁清光堪半夜稍醉玉壺空

雪後病愈至射堂作

病失千峯雪晴開萬影新鴈飛天欲暖風起野無塵弱  
柳悲羌笛辛夷思楚人攀條復顧影頗似去年春

目疾呈深甫

久思廢耳目乃復困觀瞻默坐但憑几幽居長下簾玄  
黃迷宇宙明晦錯烏蟾萬事形骸外人將不汝嫌

新晴二首

雨餘春更好日出望還新  
暄鳥啼驚客林花笑向人  
年華如過鴈世事劇飛塵  
置酒陶嘉月滔滔醉任真  
薄雲開早景宿潤減飛塵  
好在松筠色依然鳥雀馴  
避人深卻埽炙背暖生春  
未得獻天子潛書報近鄰

秦淮對月

舊熟秦淮水今浮萬里船  
泐寥明月夜淡泊始秋天  
靜境他時絕清光度曉圓  
無人漫詠史回首憶先賢

晚泊對月

川光晚都白岸色遠全青  
明月隨孤劒浮槎送客星  
南飛鵲擾擾北鴈嚮冥冥  
誰謂悲歌短能吟酒易醒

欲雪寄貢甫

欲雪天地閉積雲江海昏  
著書成寂寞玩歲覺崩奔  
鴻鴈自嘯侶鵲鵲常在原  
離憂紛滿眼浪作種庭萱

初雪

三日風振海中宵雪覆城已看秋落漠  
更逼歲崢嶸嶸嶸原

隰龍沙磧樓臺白玉京知誰錯吹律物物驟堪驚

殘雪

積素不可卷潛陽方未蘇勁風吹強起明月照全無封  
蟄龍蛇病傷根竹栢枯誰能開白日后土正泥塗

望雪山

朔風何處雪徑度江南山半出青天外猶臨庭戶間崔  
嵬海潮湧決滂暮雲還壯觀感人意長謠如可攀

戲賀段生

驃騎門下士蹉跎已白頭知人家監誤彈劒起吹愁忽

逐侏儒飽遙聞祿仕優還鄉問耆舊當憶負薪謳

生本會稽

人娶妻上國居李  
師門下十年得官

公是集卷二十二

欽定四庫全書

公是集卷二十三

宋 劉敞 撰

七言律詩

贈致政葉郎中

老掛朝冠息故園  
國人同嘆仲翁賢  
心慙白首戀三署  
意與赤松均大年  
玉樹承風榮紫闥  
史臣書美耀青編  
他時就問朝廷策  
還見公卿語鄧先



次韻和寄

講業儒林壁水開望親雲下想徘徊平原日暖歌鵲在  
橫隴風高聽鴈來隱几郡齋閑主諾薦羞家府樂循陔  
何時乞得歸寧告對襲班衣捧慶盃

寄獻淮西大哥給事

附淮西給事即敵也  
此詩當係其弟放作

千里提封盛府開照淮紅旆晚徘徊地靈固有壺公  
舊時秦不同唐相來韋斷陳編占藥喜珠揮新什詠  
蘭陔阿連今羨南飛翼酒影猶能入壽盃

送晏公留守南都

蒼龍大火明堂分原廟離宮萬乘居五帝遺聲在名頌  
三公出使用安車去思尚想多耆老條教祇煩讀舊書  
複道平臺彌百里鄒陽何處曳長裾

伯父挽詞

四十賓興七十歸清風遠與古人稀未如彭祖猶為天  
頗似桐鄉得所依

大瑩在京師伯父嘗為長洲因遂葬焉

何路可能奔遠

日此生無復待烏衣故尋庭樹丁寧誨東望吳門涕自

揮

城下種竹今春極有佳筍

環城密篠舊檀欒  
春筍新成幾萬竿  
池上龍蛇驚蟄起  
軍中矛戟繞營看  
嗚啼窈窕千重碧  
風過蕭蕭五月寒  
緩帶輕裘容自暇  
屢綦多向此林端

四月見梅花作

臘前芳樹暑前開  
笑憶周南標有梅  
玉色還如雪中見  
天香不減嶺頭來  
黃鶯未識休頻顧  
粉蝶初逢亦自猜

應與靈芝競三秀碧城瑤圃隔塵埃

寄慶州子華侍讀諫議

近有書道舊

禁中頗牧去臨戎屬國歸來敵壘空  
聞道詩書今絕幕復看天馬亦從東  
醉傾床酒留邊月歌倚鵲弦舞朔風  
猶憶平生歡一笑莫忘書札寄賓鴻

去年慶州討畔有功近西人上書乞

六經又遣使大市邊馬故并及

姚家寨道中逢李諫議

蕭蕭歸騎歷崔嵬一見塵中耳目開  
授玉同為萬里使

望雲先識二星回北荒鵬躍南溟去西極馬循東道來  
世上應無此別遠留連彊盡手中杯

逢范景仁李審言二諫議

怪來原隰滿光華不意相逢天一涯久別班荆情未易  
少留傾蓋日空斜山連木葉千峯雪地逼龍城萬里沙  
深愧壯心輕遠適自嫌憔悴聽悲笳

貝州未破書寄王子直司徒

孤城死地尚睢盱智勇俱當竭蹶趨貧且賤焉真恥也

壯之良者盍行乎料無豪傑同吳反陰有神靈助漢誅  
深怪先登少瑕叔不應時論惜蚤孤

酬宋次道憶館閣曝書七言

長廊複閣接天居炎日清風蠹寶書乍到似迷羣玉近  
饜觀疑及羽陵餘俊游真與塵埃隔逸賞空驚應接疎  
石室會須歸史筆周南寧復滯君車

九日龍華閣寄永叔

永叔有書見憶

黃花欲落曉霜濃極目秦川一望中節物還如去年好

懽游不與故人同，接羅自恣風前落羽檄。寧妨席上通還，畏簡書歸未得寄詩黃閣付征鴻。是日得秦州檄調兵備邊

寄題友生水閣

曲岸重重植淺莎，雨餘初覺長微波。水紋滿屋浮清簟，風力衝階折芰荷。境靜自宜詩興遠，夜空應見月明多。從來著述希揚子，為羨幽人載酒過。

逢永叔

絕域逢君水暫留，舉杯相屬問刀頭。久持漢節旄空盡。

獨拜穹廬死可羞  
醉裏歲華驚易老  
愁邊渭水滄分流  
玉關生入知無恨  
不願張騫博望侯

和永叔景靈朝謁從駕還宮

漢帝迎年十二樓  
明廷朝計萬諸侯  
真仙降集鈞天樂  
雲旆回翔駟玉虬  
物色遙占紫氣入  
香烟不隔曙光浮  
祕詞非為神君語  
自飭衣冠渭北游

泥雨早朝

雲氣卷舒東復西  
月華明晦曉兼迷  
正憐盛服坐假寐



金匱要略卷之二十三  
何處蒼蠅來誤難高卧山林勞夢想出門冠帶混塗泥  
人間氣味故易厭豈若從容歸治畦

次韻得午日酒

午日風光復晏陰軒昂未許歲華侵楚魂招後宜皆醉  
春醞來時且獻斟高枕洞庭看鳥度卷簾衡岳聽猿吟  
郢中寡和由來事應喜新詩有嗣音

王僧達答顏延年詩云春醞時獻斟

十二月十六日

水國冰銷天欲春山城日出景還新可憐物色曾非土

亦復窮愁不放人碌碌流年轉車轍悠悠生意厭風塵  
草茅不必開三徑杖履何嘗及四鄰

孫侍郎訪及仍携示近詩

泌水衡門野老居彤幃丹轂使君興固驚北海猶知備  
曾謂西河尚起予高卧窮愁迷歲晚立談襟抱為公攄  
浪傳方伯中和頌詎有虛儀講德書

逢呂侍郎

北鴈南鳬不自期異鄉交臂復分飛壯心已折霜侵鬢

但歲相看淚滿衣絕幕陰多逢日少滯林行苦見人稀  
子年意緒君諳識況乃登臨遠送歸

寄西臺吳侍郎

淮陽高卧彊逾時洛水嵩峯入夢思霖雨徒深旱歲望  
白雲自與帝鄉期功名擺落人間世出處優游萬乘師  
坐視天民應未可似公當就太平基

同濟川題王金吾園亭

王侯功業等山河謝傅風流倦燮和治第由來處窮僻

賞心曾是極酣歌  
歲寒松竹孫枝在  
詩罷池塘宿草多  
聞道將軍亦愛客  
春游不問主人過

謝晏公蓮實

落蘂漂香思碧蓮  
嫩芳成實澹晴烟  
玉杯側露參差重  
麟趾模金約略圓  
擷秀乍聞回急漿  
薦新還許備加遵  
涉江不限芻蕘往  
志服深希百疾蠲

本草經藕實久服除百疾延年也

答許待制依韻

水衡錢朽太倉陳  
均逸于藩布上仁  
朞月政聲歸卧理

舊邦風物變車鄰懷章昔別江湖永辭劇由來意氣真  
召伯甘棠大山賦去思留得與邦人

曹秀之待制罷福建還朝劉君王待制自長沙移  
鄧俱會郡下作七言敘別

華閣昭回雲漢間侍臣高選奉清閑曹劉共許同時貴  
楚粵初看報政還邂逅相逢驚遠別從君一笑發愁顏  
莫教鐃鼓催行色更益春風雨鬢斑

將去上清題梧桐樹

小砌圓陰覆暝霞曲軒疎牖稱相遮已成嘉實誠無用  
未遇知音勿遽嗟得地豈須矜露井隨流方共笑枯槎  
明年冠者成春服重看紛紛滿樹花

鳳凰山笙竹

仙山不記鳳鳴時碧篠空含玉潤姿海外雖傳有嶰谷  
人間似未悟孫枝道家正貴知音少野處還于靜節宜  
千歲重尋樂毅傳悠悠更覺使心悲

上巳日玉津園賜宴是日雜端為主人

御苑初晴暖景微  
侍臣還許宴春輝  
鳴禽試羽交交轉  
落葉迎風冉冉飛  
執法在前容款曲  
大官先置盡膏肥  
和平自是歡娛日  
未醉春醪未可歸

和憶幽谷二首

早聞幽谷未曾窺  
翠壁清泉入夢思  
到眼惜無名手畫  
醒心欣得醉翁詩  
種花舊比甘棠樹  
刻石今成峴首碑  
使我一麾從此逝  
勝遊當不減君時

深居忽忽春空過  
積雨瀟瀟夏欲交  
近砌梧桐新有蔭

銜泥燕子總成巢此邦卑濕酒長醉隨事文章亦解嘲  
心遠地偏人跡絕漫勞三選數誅茅

京尹仲議侍讀自成都赴關將過長安先寄

都城一別遠相望楚水秦山各異方每頌中和傳四子  
重聞京兆得三王執經誤接金華祕卧閣驚看鬢色蒼  
逃暑肯為十日飲能無歌舞薦清觴

初雪朝退與諸公至西閣

朝光初上九門開貝闕珠宮白玉臺真有燭龍浮渤海



卻占雲氣認蓬萊斗回暖景開鳴鶴稍借新芳入早梅  
更覺年華無限賞履綦重疊遶蒼苔

答河中梅龍圖

龍池柳色鎖春烟故國風光此地偏高下樓臺渾浸水  
往來車馬自隨船舉杯醉舞時相屬倚瑟悲歌忽愴然  
安敢為文敵金谷誤煩求友賦新篇

離陳州先寄潁上龍圖

蓬蒿一畝亦蘆廬終歲紛紛三徙居客耳欣沾潁川水

兒詔積厭武昌魚寧知代舍悲長缺忽幸侯門埽敝裾  
雖信師金譏數昧未甘菜子勸捐書

寄襄陽舅氏龍圖

虎符龍節鎮方州天祿先生尚黑頭南紀山川殊壯麗  
高陽賓客故風流沈碑幾度書遺愛非土他時恨倚樓  
想詠五君夸屢薦為憑三鳥寄綢繆

送司馬倩赴權官平涼尉

將女隨郎過渭城正如前日武陵行當時底事傷離別

今日安知隔死生渺渺平波侵漢苑  
累累高塚厭秦京  
登臨感慨尋常事何況衰年父子情

和春鄉答韓殿丞

暫辭金鼎擁朱旛注意雖殊體貌存  
擺落功名如脫屣  
招攜賓客許遊藩東人愁詠鴻遵渚  
北海欣看酒滿罇  
無以公歸君幸識鳳池深隔九重闕

復雨

閉門高枕避春霖眼見羣芳稍見侵  
獨醒不如終日醉

暫晴那似斷年陰老驚歲月都無用典在江湖特更深  
正想青楓千里外草長波濶亂愁心

雨中醉歸

楚山終日雨霏霏寥落村花入眼稀可惜東風變酒味  
無端宿靄破春暉屈原漁父誰清濁御叔臧孫交是非  
倒著接羅驚道路悠悠判與世相違

永叔附寄滁州庶子泉李監題十二字

瑯琊山側白雲溪石壁何年李監題翰墨一時稱妙絕

塵埃數字尚端倪  
驚看龍虎潛光彩  
恨使莓苔損角圭  
大叫發狂心未足  
竹林幽賞負招攜

臨崑亭

孤城西北起高樓  
天半崑崙入寸眸  
碧樹參差見平圃  
屯雲重疊辨軒邱  
百年禮樂逢休運  
千里江山極勝遊  
那似鮑昭空寓恨  
不為王粲獨銷憂

和永叔李太尉飲席間第

紅顏翠髮辱春輝  
繁手哀弦逐羽卮  
正使千觴無復醉

誰令中曲不勝悲，留連起舞驚殘夜。  
做寫遺音入怨詩，我識東山安石意。  
沾襟應自屬桓伊。

齋宿集禧觀戲酬永叔見寄時永叔在後廟攝事  
尚平故有五山期，獨許迎年太液池。  
貝闕碧城相絢爛，石林琪樹共參差。  
玉盃醺好經時醉，冰簟風多盡日晞。  
正想火龍勞陟降，更煩佳句寄相思。

依韻和致政龐相公上巳約遊集禧觀不至

琳館經春瑞氣浮，當時會約相車遊。  
仙花又向庭中落，

宮水還縈苑外流  
雲路空思攀去鶴  
沙堤猶憶問行牛  
明年三月芳菲在  
須把蘭亭禊事脩

馬上南風變晴

繁陰欲閉飆風來  
一掃窮荒萬里開  
日色葱曠浮渤澥  
雲容舒卷映蓬萊  
旅情更覺光華遠  
暖意何妨節物催  
醉眼卻思山雪好  
臘前容可當新梅

新種雜花樹

江邊臘破東風起  
舍側栽花遶四鄰  
要似桃源堪避世

會令桂樹默留人即看紅葉娟娟秀  
豫想喧蜂處處新  
庾宅荒涼宋亭古應須大占郢中春

答子溫雪中見寄

勁風蕭颯結衝波飛雪奔騰萬里過  
亦未妨人浴陽卧  
還聞有客郢中歌壯心可念哀鴻遠  
正色遇憐翠竹多  
會卜豐年慰羈旅敢辭荒逕重張羅

次韻和永叔歲旦對雪見寄時某于工源驛典護  
契丹朝正使人日當歸前一日始得此詩



朔風千里動高簾雷起龍山晝擁簷屬國請纓謀已拙  
屠蘇澆酒歲空添翦幡春事宜人日破鑑歸期見玉蟾  
聊欲為君留薄具燭蟲床酒水精鹽

答景彞對月

正惜蟾蜍沈夕靄忽傳鐘鼓送秋晴浮雲四卷無餘跡  
斜漢西流亦自明危檻鉤簾吟獨久薄帷高枕夢逾清  
幽蘭佳菊溥新露的歷珠華滿翠莖

立夏祠太乙宮

絳闕迎年候執期羽衣通夕侍嚴祠神光映月開璇室  
香霧含風拂桂旗路遠城南天最近地非人境日偏遲  
還聞增授無窮笑馳奏中宸對受釐

自陝到闕感而成詠

葱葱氣象瞻峽闕肅肅行裝造近畿鈞奏昔年曾夢到  
玉闕今日是生歸茂林病久迷朝序宣室人疎懶帝暉  
簪履未忘恩再造不然何路謁彤闈

送人赴闕

五月齊侯報政時  
衮章英節照西畿  
昔看高鴈冥冥去  
今喜長雌婉婉歸  
詔使相望擁冠蓋  
都人傾倒遲光暉  
師臣固有三公拜  
豈獨優游奉講闈

留別永叔

回車欲度幕南庭  
此地那知眼界清  
老覺鬢毛俱種種  
醉看風物盡冥冥  
平時慟哭休論事  
遠別悲歌更忍聽  
且共春風同入塞  
憶君時計短長亭

澄心堂讀許渾以下諸詩

許渾詩後三百年長嘯空堂覽舊篇落日孤城曾不改  
曲池高榭復依然塵埃暫憩道路客文雅相追今昔賢  
魚躍鳶飛殊有意卜居仍欲近湖邊

寄密令楊彥文

傾蓋相親成白頭離懷終日敵三秋可憐鷄黍虛朋好  
應用弦歌亂旅愁太史成書自留滯石城通信已沈浮  
王孫可恨山中久舊令曾為裒德侯

答楊令彥文

從吏相望千里餘蓬蒿無以避空虛豈惟論議沈時俗  
更覺精神耗簿書慙愧故人存推素殷勤佳句慰離居  
周南會是弦歌地莫忘尋盟一起予

寄致政張大卿

昭回雲漢麗清秋曾看星槎歷斗牛歸去還為竹林會  
相望寧減赤松遊達人軒冕都如夢塵世功名不自謀  
聞道東山多逸賞從君欲具五湖舟

送伯鎮守湖州

馮公白首敬長裾  
萊子斑衣樂有餘  
金馬門前歌避世  
水精宮裏奉安輿  
萬重巖岫高藏日  
百丈溪前俯見魚  
去去春風稱行樂  
京塵回首憶離居

次韻四叔父出守新定寄歐陽一首

勾吳半在海山中  
聞道驅車更向東  
舊治空傳漢都尉

漢丹陽都尉治歙

遺民無復楚諸熊

楚之先熊繹封丹陽其後徙郢

文章老去

輕時輩勢利恬來付  
覺雄臥理便應長閉閣  
一方還見

古人風

園人獻蒲萄

婉婉柔條萬虺蟠  
累累佳實紫金寒  
甘泉滲液秋香重  
瑞露凝膏曉色乾  
鮫室珠盤驚不定  
蓬萊金體恨微酸  
貴人寧借涼州牧  
暫負衡門報一餐

送劉先輩

年十八舉進士通五經  
登科以年未及格守選

關東少年西入都  
諸老先生驚不如  
射策遂為天下選  
限年卻就里中居  
豫章固起秋毫末  
千里方從跬步初  
會見高明成偉器  
不憂絳灌毀新書

聞范參政巡西邊

漢與匈奴如弟兄猶傳敵騎向邊城數煩卿士親持節  
始恨儒生妄請纓形勢倒懸方件逆計謀無益是縱橫  
古來賢哲多屠釣公試諮詢策太平

次韻和王刑部秋日寄元兄尚書

脊令原隰曉霜清李子嗟行不自寧歸夢時環北斗極  
相輝猶隔太微星源流淮水占何遠羽翼西山藥最靈  
接武禁嚴多故事共看蘭玉出階庭



至日早起

至日應添一線長  
漢儀憶奉萬年觴  
鳴珂列炬隨丞相  
長劔高冠滿未央  
法從此時瞻玉座  
侍臣獨許近清光  
輶軒今出荒山外  
厭見塵沙萬里黃

冬至

殊方喜及固陰消  
積雪層冰意亦聊  
就日稍欣南極永  
觀雲尚恨帝鄉遙  
閉關自信天心復  
吹律應知玉琯調  
留滯能無越鄉戀  
甘泉受計萬神朝

聞元旦大朝會

玉帛雍容萬國來  
帝城如斗挹春迴  
旂常影亂三辰象  
鐘鼓聲喧百里雷  
北極正臨丹鳳宸  
南山遙入萬年杯  
諸神受計明堂定  
留滯江濱志已推

公是集卷二十三

欽定四庫全書

公是集卷二十四

宋 劉敞 撰

七言律詩

招友上清宮

脩竹高松無俗塵，全然不似近城閨。  
黃冠習靜多藏客，野鳥忘機卻傍人。  
高閣切雲銜落日，廣庭霏雨濕清珉。  
北牕固有逍遙地，來讀離騷戴角巾。

聞范饒州移疾

汲黯廉平漢主知  
淮陽移病苦情羸  
偃藩政事應無及  
伏閣精神定未衰  
天欲期人身必之  
帝疑飛將數多奇  
何當半夜開宣室  
獨使雍容對受釐

編杜子美外集

少陵詩筆提懸河  
亂後流傳簡策譌  
樂自戴公全廢壞  
書從魯壁幸增多  
斯文未喪微而顯  
吾道猶存嘯也歌  
病肺悲愁情自失  
苦吟時復望江沱

子美詩云病肺卧江沱予亦有此疾

鼓角樓宴集

周城百雉擁中軍阿閣三間麗白雲燕雀總知依盛德

山河相與助雄文

此樓府公作  
自為之記

輕裘緩帶居多暇旨酒

嘉肴客易醺還識魏牟懷北醺正逢長日扇南熏

夏日上府公

紅芳過盡綠陰多索寞無如長日何午影遲留成蘊暑

熏風飄蕩作清和夢餘欲驗松生腹暴罷真知斧爛柯

還想高吟酬美景訟庭岑寂長青莎

府公有詩云高吟  
酬永晝痛飲嘆華

年故  
及之

賀司馬君實何濟川得寵公炭

上府愛才天下聞  
兩軍素出將軍門  
欲正大闕慰民望  
豫排寒風作春溫  
不煩束縵資遊說  
聊復遊賢報國恩  
自笑野人卧窮巷  
負暄方擬獻天閣

獨宿直舍

談笑從容宮漏稀  
高軒去盡掩重扉  
風含王宇霜威勁  
月上疎牕燭影微  
周衛相望誼夕警  
爐香不斷護朝衣

塵軀更覺仙山峻  
旅夢端從江海歸

五月望日赴紫宸謁待旦假寐

半夜北風天反寒  
倒衣驚問紫宸班  
雲容不辨陰晴際  
月色猶迷爽晦間  
獨喜鳴鷄應鐘漏  
正憐殘夢識江山  
濯纓簪筆初無補  
空愧紛紛數往還

送李留後守東平

少壯去人如水流  
似君那作待祠侯  
高談每及功名際  
出守真寬聖主憂  
麾下百城包海岱  
道旁千騎擁貔貅



家聲時論俱輝赫世將寧為好時羞

題連理亭

唐乾符中所建其棟梁頗宏壯云自盧龍涉海致之也

靈光蕪滅泮宮平三百年中獨此亭無復喬林見連理  
尚傳高棟出窮溟疎簾清簟宜炎日苑柳長梧半廣庭  
卧向波篁慙薊植燕山都欲買刊銘

答陳州通判廷評同年

黃門獻賦接羣賢上國知名獨累年不謂招徠從隗始  
至今慚愧在盧前簿書幾廢三餘學繩墨空勤一割鉛

還喜遷喬友聲近高山流水入清絃

庶子嶺帳館寄隱直

離腸易感歲華催更雪龍沙望紫台持節不眠宵自永  
聽笳無事淚空摧扁舟何處山陰雪驛使他年嶺上梅  
欲寄一書愁已亂天邊應候客星回

過中京走馬上平安奏狀

載驅冬歲拯河源

北庭在橫水北  
云自天潢也

狀奏今朝款帝閭目

斷白雲浮魏闕心先飛騎向中原揣摩詎試衡人術感

激空銜國士恩猶使匈奴戴黃屋南歸慚弔陸公魂

冀州正月十六日飲席

月缺雪殘雲亂飛千燈相照續長輝寒欺短夜禁杯酒  
春入東風試舞衣老惜佳辰經歲得醉驚陳迹出門非  
漁陽鼓節尤悲壯知我心從萬里飛

無雙亭觀瓊花贈聖民

東風萬木競紛華天下無雙獨此花那有靈雲凌暖日  
不為琪樹隔流沙祠城寂寂春空老江雨冥冥日易斜

仙品國香俱絕妙少傾高興盡流霞

園人獻芍藥

淮海由來草木大春工殊復自嬌嬈始知隋苑多佳麗  
未覺吳宮久寂寥冰雪肌膚明綽約雲霞衣服潤飄蕭  
一枝漫取堪誰贈老去風情不自聊

雨中北軒晚寢

樹色禽聲相與閒吾廬仍共一枝安浮雲蔽日綿綿雨  
積水嬰城慘慘寒還恐百芳從此歇不知后土幾時乾

閉關高枕交游絕一夢江湖意緒寬

和府公多葉榴花

翠條紅藥映貧家笑倚熏風拂露華  
重疊火雲燒落日淺深金鼎蠹丹砂  
多情強自含春恨不語那能學館娃  
但寄一枝共醉賞試將顏色比裙紗

寄謝霍丘靜樂亭

城西陵谷幾推移仍有中亭玉樹枝  
從政真同傲吏隱賞心能與古人期  
誅茅改築成芳榭引水交流漲曲池

聞道小山多麗句還因春草夢新詩

晝寢

屋邊高樹綠雲陰堂下清池碧玉深卧想溪山迷遠近  
夢為魚鳥或飛沉治逢平日如無事老覺衰容稍見侵  
聊取南華寄齊物不為東武極悲吟

雨中家人致酒

急雨連宵晝不收草堂晨起似新秋山歌倚瑟清無賴  
野饌隨樽特自優追古最宜真渾沌旁騷仍有畔年愁

綸巾搭腦醒還醉得此堯民已甚休

答令狐司封使君舟中見寄

汝潁相從彌十年江樓今日遲歸船自驚物役還如昔  
但覺詩情更爽然寥落鶯花千騎裏蒼茫烟雨萬山前  
未知後會仍何地彊醉春風酒似泉

某戊子春與使君  
會汝南到今適十

年

次韻和春卿城西同步

夕光卻射戍樓紅野色遙瞻百里中玉帳坐休鈴下衛

春衣行試舞雩風招攜直許威儀略戲笑深矜意氣融  
流水高山俱在眼知公令望共無窮

往得南嶽玄猿特善嘯立秋後風雨頗涼聲尤清  
絕憐其山林之思為作七言

薄雲疎雨濕風枝衡岳猿啼憶此時回首那無萬里感  
向人時作一聲悲鍾儀故有南冠恨莊舄猶多舊國思  
車馬紛紛九域客路傍翻笑斷腸為

過思鄉嶺南茂林清溪啼鳥游魚頗有佳趣



山下回溪溪上峯清輝相映幾千重游魚出沒穿青荇  
斷螭蜿蜒奔白龍盡日浮雲橫暗谷有時喧鳥語高松  
欲忘旅思行行遠無奈春愁處處濃

過臨波亭

綠楊芳草舊無蹊竹隔花源敵剡溪水影時翻高檻動  
天形略抱曲城低逢迎野興鷗雙下點綴春愁鶯亂啼  
宿雨楚山雲正滿高樓莫上使人迷

至日宴水上嘔吐先醉上府公

南極微陽中夜新碧池風物曉來春鼓聲似動魚龍伏  
旌旆不驚鷗鷺馴東閣于今待賢士西曹不意吐車茵  
博陽氣度平津學雖賤猶堪頌得人

次韻奉和給事中

知蔡州吳育作附

律上陽和雖始煦樽前人意已生春濠梁且欲觀魚樂  
淮郡何能致鹿馴為訪心朋猶縱棹況逢時雋與均茵  
別車豈必辭沈醉更有高陽倒載人

送沈康學士知常州

沈自博士出郡某少時居客此州甚久

三科妙選漢臺臣君去分符牧遠人富貴須為千騎長  
中和好布萬家春山川陽羨由來勝謠俗延陵自古淳  
曾是倦遊羈旅地送行曾羨兩朱輪

送柳舒州

金馬宿儒當世賢著書天祿自忘年中和屢以樂職用  
九次方為耆老遷何恨一回仍出守會須千室看鳴絃  
祇因閉閣江湖上正想遙心象魏前

送張蘇州

始上蓬邱翮羽儀  
舊更臺省著清規  
懷章又下芙蓉閣  
候騎先瞻烏隼旂  
楚澤潦收騰駕遠  
廣陵濤起渡江遲  
吳中事事皆奇勝  
還見風流太守詩

送刁越州

笑持符印下瀛州  
真得千巖萬壑游  
父老為郎無自苦  
鑑中行樂不知秋  
居人舊俗多姚姒  
幕府連城半斗牛  
太守會兼四千石  
璽書寧復久淹留

送修撰張待制知越州

倦簪華筆直承明自請分符江外行真得蓬萊為治所  
徑從雲漢濯塵纓山游訪古窮書穴春事劬農見象耕  
若向鑑中望明月會吟還肯寄新聲

送張兵部知遂州

錦帳郎官錦里賢  
皁衣休直綵衣還  
懷章過邸驚羣吏  
建節乘春感舊關  
道側壺漿積遺愛  
里中牛酒慶承顏  
朝廷孝治君先布  
更聽傳歌太學間

送彭待制知瀛州

趙北燕南如掌平  
定知臺選寄長城  
雅歌不廢軍中樂  
緩帶能令塞外清  
傾蓋由來欣意氣  
著鞭從此想功名  
灞池送目邯鄲道  
倚瑟空多惜別聲

同鄰幾持國過杜和州

江南太守水齋居  
殘雪層冰正滿渠  
忽憶山陰乘興往  
可憐心抱向人攄  
放歌浩蕩驚狂客  
換酒從容解佩魚  
四座歡衷兩傾倒  
歸鞍欲犯夕鐘初

寄獻臣

通塞由來自有期，奏書未上莫嗟咨。  
錐藏勉後三千客，舌在湏強百萬師。  
固有青雲堪自致，暫虛丹桂不為遲。  
如今相府聞名甚，章丞相雅知君應以雄文薦赤墀。

離京後寄貢甫隱直哉生魄後一日雨中作

清川如帶屢回環，信宿猶居百里間。  
敢恨淹留同桂渚，正憐風雨似梁山。  
月殘虛魄無由共，雲映高樓不可攀。  
卻怪夢中翻識路，化為蝴蝶一飛還。

伯鎮出都後見寄

疊鼓鳴笳太守船都人傾注似登仙  
舊遊俯仰成陳迹離思紛紜遠別絃  
愁目青楓空自極素書雙鯉不忘傳  
恐君未得江湖樂追詔方將急用賢

寄劉景烈

前寄新詩未及答  
移商陽關部署

漢設重關斥塞垣詔移飛將護秋屯  
邊庭無復窺南牧燕客時應祭北門  
清酒肥牛宴長日輕車精騎獵平原  
窮途何必多垂淚況復詩書盛討論

寄隱直



江漢相思山萬里君家少室定西東年華過去如流水  
心事差池似老翁一世共爭蝸角上微生多付酒杯中  
窮途何必多垂淚吾更冥冥笑阮公

寄王二十

先借王杜甫外集會集未及錄近從吳  
生借本增多于王所收因悉抄寫分為

五卷又為作  
序故報之

昔借君家杜甫集無端卧疾不曾編近從雪上吳員外  
復得遺文數百篇夫子刪詩吾豈敢古人同疾意相憐  
子美亦有  
肺疾也新書不惜傳將去悵望秦城北斗邊

新居陳州城下讀書作

誅茅負郭楚人居  
泌水衡門自有餘  
數困米鹽希辟穀  
素輕農圃重捐書  
絕糧尼父期先進  
畫卦羲皇序古初  
千世風流尚在眼  
百年貧病不欺予

讀漢書

賈誼求為典屬國  
終軍願得使匈奴  
和親不及當時策  
慷慨猶為大丈夫  
百年強敵輕中國  
一世奇功悲腐儒  
聞道邊民尚嚴警  
異時回首恨江湖

連雨三日東軒讀書

雨中無復故人居寂寞閉門三日餘卻信袁安似有道  
未知原憲定何如浮雲極目無由卷積蘚侵堦不易除  
正賴高眠堪自遣時時紛亂滿床書

次韻滕岳州謝王南郡酒

誰信專城千騎居空齋圖籍兩三厨銷憂盡付鴟夷酒  
乘興兼忘阮籍塗愛客誰先魏公子長貧卻愛范萊蕪  
歸軒仍有東門餞顯父還須至百壺

和章伯鎮

南上湘潭誰記初北還宣室受釐餘共憐賈傅才無敵  
真作揚雄老著書調笑羣騶飢欲死去來千騎樂何如  
洞庭木下鱸魚熟三嘆新詩重起予

和滕巴陵寄張虢州

明府功名期壯年滯留中路鬢成斑豈知汲黯輕為郡  
真為劉伶善閉關歸夢未嘗離帝所謫仙寧久混人間  
會看使者持三節緩帶輕裘且自閒

公是集卷二十四

欽定四庫全書

公是集卷二十五

宋 劉敞 撰

七言律詩

寄楊子華閣老使君

吾邱不樂直承明  
固請分符關外行  
賜冊最榮批鳳尾  
離羣獨恨出龍城  
壯謀欲負腰間組  
愁思空搖塞外旌  
塵土滿衫頭半白  
一聞班馬不勝情

風雨

晚雲蒸雨瀉驚湍積水浮城五月寒卑濕向人如楚澤  
風塵回首憶長安歲華徂暑參差盡旅館懷歸去就難  
自昔梁山有遺操試悲繁手一清彈

重過華陰馬上口占寄李君錫王懿臣薛師政三  
漕

三歲重過二華間哀年彌覺厭塵喧自知碌碌初無補  
正是紛紛不憚煩江壁向來憂鄭客鼎湖今日望軒轅

修門漸近翻鳴咽滿面風埃涕淚痕

過中京後寄和貢兩弟

歸鞍蹀躞弄輕塵滿眼韶光破宿雲去國幾愁歌白紵  
上天真喜望緹羣華林雪盡鶯先轉廣陌風多草競熏  
我欲還家十日飲益須釀酒張吾軍

舍弟東還病中口占七言奉寄景仁彝唐公甫

眼暗頭昏逾十旬

所苦正如此

泔泔終歲髮華新幽如羗里

迷天路

韓退之拘幽操云朝不見日出暮尤憎日光

醉似中山與鬼鄰

體中憤憤



如醉酒者

閉閣卻憐廷掾力

府事屬丞掾責大指而已

廢書彌信道家淳

病眼尤不便閱書

過八紙則憤悶矣  
修門已後君無恙  
試枉招魂慰滿身

楚辭云願賜不肖之軀放遊志乎雲中  
顧皇天之厚德  
逮及君之無恙  
某自先朝三十九年出守雍都故云

句容劉同年寄示游山詩及水煎

江外三峯倚碧天  
古來相續幾神仙  
自無飛骨何由到  
賴有新詩尚許傳  
餌木始知堪度世  
聽松真得自忘年  
會驅雞犬從君隱  
與擇華陽數畝田

登城

前歲登城日幾回去年猶記隔辰來老侵筋力銖銖減  
慵壞心情寸寸灰幸有風光相挽引那無賓友共追陪  
北臺好在中秋月便是重陽菊藥開

喜春卿自陝歸

休汝曾更月旦評幾年漂泊倦塵冥神峰好在巖巖石  
符采依然兩兩星天祿自嫌書尚白絳帷猶喜眼猶青  
台南風什知多少一一親弦更許聽

聞鶯

舍南舍北柳陰陰  
竟日啼鶯不自禁  
羈旅可憐還擇木  
間關似欲向知音  
鳩鵲無事催芳草  
燕雀相喧守舊林  
幽獨閉門驚歲晚  
固煩求友慙愁心

寄貢甫時遷居城南水上

城南風物似江湖  
卜築尤宜近水隅  
俗薄容垂真釣否  
庭閒得種此君無  
關身調度惟存劍  
適意圖書略滿厨  
心遠地偏俱可喜  
免逢甲馬與塵塗

中使傳宣二月一日  
史院賜御筵某亦預  
召作七

言呈禹玉真孺景仁三內翰

虞書紀典上稽唐魯史傳經近屬商刺玉春山瞻氣象  
積星東壁聚鉤芒朝思膏飫懽情洽天令中和盡刻長  
雖引客卿譏子墨翰林還許望清光

答次道學士

來詩末句  
及芍藥

世路相逢難自期江城三歲想瓊枝寧知邂逅驅千騎  
亦復東南寄一麾把酒聊同醉鄉樂看花欲後夢秋時  
舊都紅藥猶堪賞不負風流謝客詩

送陝府祖學士

承明持橐倦徂年自陝分符得近關人物風流二南後  
山河形勢兩周間莫嗟落魄書猶白共許優游鬢未斑  
數醉申湖好風月傳車行且趣君還

酒席贈欽聖提刑學士

橐捐不預朝廷議落莫真成老禿翁放眼能寬蜀邸禮  
高賢信有古人風都門倏忽三年別樽酒淹留一笑同  
還有野歌隨拙舞肯教庭炬徹明紅

秋日和韻

禁垣清切近雲霓  
楚客逢秋意亦悲  
拙學由來玄尚白  
敝裘何意素成緇  
解嘲卻笑朱丹轂  
迂俗兼懲百一詩  
短景正須恭玩歲  
薄寒寧厭酒盈巵

涵虛閣書卧

池水無波清照心  
庭柯交讓綠成陰  
游魚自與江湖闊  
翔鳥不期山谷深  
身外悠悠日復夜  
世間擾擾古猶今  
寄愁天上從吾樂  
高卧聊為招隱吟

于司錄東園

辟疆園圃厭城闐聞道池臺事事新  
自置一樽消永日別留槃石待幽人  
雨添草色迷三徑風散花香入四鄰  
亦欲肩輿乘興去主人何必舊相親

送劉郎中監靈仙觀盡室而往

華髮星郎七十餘碧山遙訪羽人居  
白石不為天上藥淮南欲試枕中書  
長纓自濯滄浪水高蓋仍瞻駟馬車  
福地神仙應易致幾時南嶽候乘輿

漢武帝南巡禮  
天柱為南嶽云

奉和諸公御製後苑賞花釣魚

四照繁英拂檻開  
九重芝蓋賞春來  
卿雲共和光華旦  
瑞霧偏凝沆瀣杯  
池藻躍魚波淡蕩  
林光傾日景徘徊  
淮陽閉閣頭今白  
夢遶釣天惜未陪

秋晚西樓

微霜欲墮木葉脫  
積潦已收天宇清  
皎皎日華映林莽  
瀟瀟風色閉柴荆  
正憐邊馬秋防塞  
何處悲笳暮繞城  
回首浮雲滿西北  
七哀還見古人情



送劉中允渙年五十餘以潁上縣令致仕卜居廬

山

五柳先生厭俗紛拂衣歸去卧江濱松菊還同昔人好  
山川復似向時新瀑泉飛雪千巖晚仙杏蒸霞萬樹春  
亦欲扁舟乘興往滄浪借取濯埃塵

答令狐司封求酒

馮公郎隱髮蒼蒼撥棄塵煩得醉鄉富貴兩行安用聖  
滄浪獨醒詎非狂顧慚宿釀能千日遠愧深衷頌短章

當就天公借北斗更傾東海益君觴

持禮北庭回示希元并寄之翰彥猷當世

肅承朝命謁穹廬卻卧空牀涕滿裾不敢復論天下事  
更能重讀篋中書男兒戰死自無恨國勢倒懸誰為攄  
我本不來人強我百年空使愧相如

聞鶯

陰陰老樹連村路冪冪輕烟過雨天長愛禽聲能永日  
似于鶯友欲忘年朱櫻紫椹看齊熟深巷荒城得屢遷

朗詠謝公池上作勿驚春物變熏絃

元日發古北口寄禹王直孺昌言三閣老

初入燕境

桂酒椒盤共發春山川雖舊物華新仲尼魯史王正月

泰帝河圖歲甲寅

今年歲至甲寅與河圖天元同

玉殿聳聞斟白獸火

城想見接清塵應憐二使星安在北斗杓端析木津

立春後遊杜城陳丞相郊園

韋杜勝遊誰可尋相君舊隱對雲岑水渠婉轉蛟蛇活  
霜竹參差孔翠深故老能言卧龍地兒童不用滿籬金

郡齋殊負青山郭空挹芳樽慰客心

古詩朝辭青  
山郭暮宿青  
山上青山

不可上步步相悵悵謝朓亦  
云不對芳春酒還望青山郭

### 至日登樓

南極陽生天地新高樓氣色已含春得無鴻鴈翻歸翼  
應有龍蛇動蛰鱗亦復書雲占楚歲不辭為壽引湘醇  
甘泉從祀雖能賦悵望鉤陳擁北辰

是日上  
親郊

### 久雨

長至須臾二月來朔雲零雨未嘗開陰藏晝景長繡線

寒奪陽和潛律仄宿翼困冰多後鴈暗香漂水惜殘梅  
撩晴召暖無他術安得涼風一夜回

俗云風回則晴

同鄰幾伯鎮觀祕閣壁上蘇子美草書

蘇子佯狂不自疑漢庭籍甚莫言非放歌金馬居常醉  
窮老滄洲不更歸

蘇在吳中自為作詩曰我今窮無歸滄洲送餘生

浮世功名

均夢寐平生翰墨獨光輝壁間數字龍蛇動神物通神  
亦恐飛

立春

臘去春歸意可憐久為羈客海西偏  
溫風泛泛生卮酒和氣融融媚管絃  
剪綵直為兒女戲土牛向自國家傳  
事情爭愛新翻擲還道今年勝去年

立春日紫宸拜賜歸持國見率同過江十不行

蓬萊佳氣舊無時春物迎新特更宜  
燕識玉箱來自早漏隨宮線報還遲  
溝聲破凍纔通苑酒力含風易滿卮  
蓬鬢不堪雙綵勝懶隨君向習家池

賀隱直

寂寞三年倦一飛知音不限向來希雖然主簿非高士

猶喜分曹近太微

執法在太微垣

吏部銓中趨俗狀京官班首

望天威漢儒多有司空掾努力新書更發揮

桓譚何休皆以司空

掾著

書

### 送楊景修祕校歸

武夷曾孫塵外仙手攜桂枝歸故山夸鄉始信一經是  
衣錦不須三組還蓬萊觀書聊復爾枳棘棲鸞銖未然  
野人放蕩辱先進慚愧竹林諸阮間

答校書郎孫侔少述

金華勸講愧通經  
銅虎分憂強請行  
千騎亦知翁子貴  
一麾誰覺仲容輕  
西賓落莫空遺俗  
北斗闌干有舊城  
欲作過秦無與語  
故人高論憶盱衡

次韻奉答屯田宋員外

汗血龍文千里駒  
長楸未試踟庭隅  
一麾幾老諸侯相  
五月初還建禮趨  
獨得鳳毛驚衆目  
相望花萼照亨衢  
白頭漫感悲秋賦  
自笑妨賢此禁塗

潘岳秋聲賦善  
乎宋生之言



為轉運沈郎中題

寶軸牙籤三萬餘中園華宇蔭清渠風流復見郊居賦  
榮觀歸乘使者車俯仰江山樂無有優游文籍昔誰如  
何當去此從君語盡得平生未見書

題溪堂

蘇俠遺懽小洞庭高堂殊恨曲池平山川滿目仍非昔  
魚鳥依人自不驚瑣細幽花相嫵媚回環流水共澄清  
秋風初足江湖意不作鱸蓴萬里情

和伯鎮初拜湖州

君向江湖領一度親歡自與宿心期  
腰間紫綬新光彩都內青錢厚寵私  
廐吏莫催乘傳去詔恩方許戍瓜時

碧瀾堂上青山下爛醉尋春亦未遲

伯鎮歸館待闕當以明年夏去京師

和韓司諫移臺宮雙檜植于道山

仙子分根白鹿檀定知高峭出巖端  
濃雲借色曾無變初日移陰漸可觀  
風外共成蒼鶴舞夜深齊作翠幢看  
人今俟爾為梁棟慎勿輪囷取自安

新秋

七月荆人亦具裘朔風颯颯動昭丘巫峽出雲杳無定  
洞庭飛月絕堪愁長歌濯足滄浪水回首開襟西北樓  
宇宙歎蒸暫瀟灑小山青桂與淹留

和宿直晨出遂赴奉慈齋告寄持國子履

玉殿鳴鞘闢寢闈銀臺歸騎蹀霜蹄樓光已映朝霞動  
樹色猶銜宿靄迷身貴承明翻厭直歲窮樽酒幸招攜  
太常幾日休齋禁亦欲從公醉似泥

遊平山堂寄歐陽永叔內翰

蕪城此地遠人寰盡借江南萬疊山水氣橫浮飛鳥外  
嵐光平墮酒杯間主人寄賞來何暮遊子銷憂醉不還  
無限秋風桂枝老淮王先去可能攀

再遊平山堂

背城歷歷纔十里經歲悠悠能一來可惜薄書捐白日  
強從賓客宴平臺暮雲自與千山合醉眼時令萬宇開  
老子誰憐興不淺黃花欲落更添杯

病中口占七言奉送前成都尹呂寶臣龍圖還朝  
聞遠故城長樂坡三年從此送君過宦遊不道相逢少  
愁病何堪慘別多強敵猶知奉威信巴童莫忘習中和  
廟堂應趨緇衣拜少緩離亭白玉珂

月夜獨酌

涼月破雲涵碧霄暫憐庭宇斷塵囂露翻高樹光明滅  
風度疎篁影動搖驚鵲似投人處息暗蟲如恨歲華凋  
短歌薄酒清輝裏百感先秋不自聊

奉和永叔雨中見寄

泥塗后土未曾乾，騎馬相過行路難。  
卧聽鷄鳴知景晦，起逢花謝惜春殘。  
銀臺幸闕連宵直，樽酒能謀盡日懽。  
紅藥蒼苔雖寂寞，多情肯作舊游看。

城樓晚望

長夏淮天卻似秋，居人未解白貂裘。  
雲起岱山時漲雨，風迎滄海欲橫流。  
日邊渴問長安使，天際頻瞻顧客舟。  
自是七哀宜寫望，不關非土故登樓。

答宋都官游驪山見寄

華清宮殿映春暉，未醉三晡莫遽歸。  
人事廢興猶可記，風光流轉不相違。  
歌臨灞岸朱絃脆，走度章臺汗馬肥。  
自是秦川貴公子，城隅相望不能飛。

和孫少述題虎丘

吳墟秦燼滅遺蹤，誰見千巖鎖梵宮。  
化出樓臺雙樹外，密移天地一壺中。  
石形虎踞森相向，劍氣龍盤冷射空。  
羈宦無由蠟山屐，因君詩句夢江東。

和孫侔鴈蕩山二首

黿翻溟漲折靈山  
漂落塵區莽眇間  
自有神仙護真境  
故令林木斷人寰  
碧城萬玉重重合  
琪樹三株寂寂閒  
安得長風破高浪  
拂衣東去一躋攀

天台賦後世多賢  
復在君家鴈蕩篇  
氣逸還令人聳動  
境幽初許俗流傳  
萬峯林立浮雲外  
一徑梯橫絕海邊  
聞道歸艍從此逝  
秋風招隱特依然

答羅同年憶楸花之作

驅磨市易錢帛諸  
禁非假不得歸家



勾稽嚴密不通賓因見楸花憶去春當日同僚嘗把酒  
于今邑子遠思人臨安草木皆蒙錦金谷池塘各鬪茵  
自笑癡兒了公事經年不識酒沾唇

依韻謝某送行詩

天涯畢昴隔烟塵風雪梁山憶侍親行記簡書聊接浙  
去懷印綬正逢春評依月旦情增戀

行期在  
月末

詩感蘭陔

意重陳先向沙隄候歸騎卻瞻霖雨作伊晨

閣下午寢晚歸

高閣遙依日月光  
蒼苔重疊紫微芳  
蟬聲已覺迎秋急  
雲物還驚過午涼  
獨往山林非復昔  
夢為魚鳥不能忘  
芝泥封詔雞棲樹  
半落宮槐滿地黃

觀沖卿所試詩賦賀府君

斗城烟霧隔金鑾  
日破輕陰玉滴寒  
捷筆補天凌造化  
高文驚世湧波瀾  
夢成白鳳飛鳴遠  
功就丹梯步武寬  
回首蓬萊笑清淺  
春風前後發芝蘭

歲晚偶作

不嫌臘過催人老直恐春歸惱客愁  
柳眼梅心俱次第  
雲容雪意與淹留  
歲窮楚俗依稀古  
冰解巴江洶湧流  
遣興長須一樽酒  
呼兒徑典敝貂裘

立春日過薦福寺

一歲還隨一歲來  
立春人日競相催  
細細谷風能破凍  
熙熙習俗似登臺  
初陽弄色明高柳  
殘雪留寒伴落梅  
淮北風光元自好  
壯心摧謝不勝哀

宿齋中書外省答永叔京尹內翰朝回馬上見寄

并謝子華次韻

朝罷章臺日幾竿  
遙聞走馬試雕鞍  
春風自發遊人意  
宿雪偏留下省寒  
坐久獨知宮漏永  
詩成誰畫玉堂權  
會湏一辨如泥醉  
從笑歸來筆向乾

富谷老人臧自用云  
本京師兵士咸平中  
沒番五十餘年矣

白髮哀翁雙涕零  
曾隨諸將戰咸平  
一來隴右迷歸路  
卻問中華似隔生  
思報漢恩身已朽  
恥埋邊壤死無名

今朝縱觀非他意得見官儀眼自明

都運陳光祿自河北移陝西以病不得詣別作七

言奉送

西州判袂忽三年夢想城南尺五天謝病歸來真老矣  
傷春刻意益茫然受降塞外威名遠足食關中寄注專

北顧邯鄲復臨灞更能一醉促哀弦

漢光祿徐白為築塞外受降城也某

向守雍數同杜城之游

游禪智寺

重岡斗上半浮雲行繞芳叢日已曛  
蒙頂川原眼中見揚州歌吹竹西聞  
梵王重壁臺先毀古佛雙林火亦焚  
會看旃檀重滿地莫悲糜鹿向成羣

寄題黃州李史君常杜山居

主人朝隱望誰先卜築城南地復偏  
服食早知仁者壽退休前惜大夫賢  
封千戶比蒼蒼竹畝一鍾金上上田  
從此去天纔尺五幾時雞犬亦登仙

大卿少時嘗遇隱者得藥服至今鍊

氣卻老亦有奇效

和龐相公寄題白郎中鳳棲巖山居


丹鳳何年此地棲  
蒼山流水入巖扉  
主人早逐長離去  
邑子先期駟馬歸  
脩竹萬竿終歲碧  
蹲鴟千畝入秋肥  
已聞父老醜牛酒  
會看夸鄉畫錦衣

次韻酬張真溫

未曾相見已相知  
自許聞絃可識微  
每信白頭于義得  
豈將青眼向君違  
坳堂仍滯三年蟄  
寥廓方看萬里飛  
誰謂夜光投道路  
莫因長鋏起思歸

陪府公汎汝水作七言奉呈府公給事

寒波略傍曲城流彩鷁遙兼翠蓋浮  
努力濟川天下望暫時乘興鑑中游  
蓬萊清淺迷滄海河漢昭回隔斗牛  
君看龍門盛賓客世間還自有仙舟





公是集卷二十五